

Aatsitassanut inatsimmiittup § 45c -p allannguutissaatut inatsimmik siunnersuummik kingusinnerpaamik UPA 2017 sioqqullugu saqqummeeqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Taamaalilluni aligoqqiit (diamant), aligut aappalaartut (rubin), safir, smaragd, chrysoberyl, kiisalu opal-it §§ 45-miit 45a-mut malittarisassat malillugit katersorneqarsinnaalersillugit.
(Inatsisartunut ilaasortaq Peter Olsen, Inuit Ataqatigiit)

Akissuteqaat

(Aningaasaqarnermut Aatsitassanullu Naalakkersuisoq)

Aappassanneerpeqarnera

Aatsitassanut Ataatsimiititaliamut aalajangiiffigisassatut siunnersuummik akuersaartumik suliarinninnerannut qujanaq. Aatsitassanut Ataatsimiititaliap isumaqatigiittup aalajangiiffigisassatut siunnersuutip akuerineqarnissaa inassutigimmassuk Naalakkersuisut iluarisimaartorujussuaat.

Inersuarmi maani atituumik isumaqatigiinneq, partiit akimorlugit, inatsisissatut siunnersuutip, Naalakkersuisut UKA2016-imi saqqummiutilersaagaata, oqallisigineqarnissaanut pitsaasumik tunngavissaliissaaq. Siusinnerusukkut oqaluttarfimmi maani oqaatigeriikkattut, allannguutissatut siunnersuummi pisussami ”aatsitassanik akisuunik” taaneqartartunik katersisinnaanissamut periarfissaq annertusineqassapput.

Aatsitassanut Ataatsimiititaliap isumaliutissiissummini suliassanik suliarinnittarnerup pisariinnerunissaa aammalu aatsitassanut suliassaqarfimmi siunissami ingerlatsivimmi aqutsinermi ilitsersuineramik suliaqartarnerup nukittunerunissaa, ujartorpai. Aatsitassanut suliassaqarfimmi maleruagassat ersarinnerulersinnissaat eqqornerulersinnissaallu, inatsisissatut siunnersuutip suliarineqarnerani Naalakkersuisut ilungersuutiniarpaat. Siunertaavoq innuttaasut aatsitassarsiornermik suliffissuaqarnerup ineriartuaalersup peqataaffiginissaanut pitsaanagerusunik atugassaqartitaalernissaannut tamanna iluaqutaassasoq. Taamaattoq kisianni eqqorpoq inatsisini maleruagassat paasiuminartumik pisariitsumillu paasissutissiissutigisarnissaat Aatsitassanut Ikummatissanullu Naalakkersuisoqarfiup suliassarigaa pingaarnerpaaq, taamaalillutik pingaartumik annikitsumik aatsitassarsiornissamut pisinnaatitsissummik pigisaqartut, aatsitassarsiorniluni misissuinermut atatillugu suliassarpasuit ingerlanneqartussanngorpata, maleruagassanik paasinninniarlutik ilungersuuteqassanatik.

Aammattaaq Naalakkersuisut tamanut ammasumik tusarniaanerup ingerlanerani allannguutissatut siunnersuut pillugu paasissutissiilluni ataatsimiititsinissaq annikitsumik aatsitassarsiortartut peqatigiiffiannut pilersinneqaqqammersumut neqeroortugissavaat, taamaalillutik annikitsumik aatsitassarsiornissamut pisinnaatitsissummik pigisaqartut pioreersut, allannguutissatut siunnersuut UKA2016-imi akuerineqassappat, tamanna qanoq sunniuteqassanersoq, paasissutissinneqassallutik.

Taamatut oqaaseqarlutik Naalakkersuisut Aatsitassanut Ataatsimiititaliamit inassuteqaat
taperserpaat.